

VENDIM
Nr. 63, datë 11.5.2017

PËR MIRATIMIN E MARRËVESHJES PËR PJESËMARRJEN NË TREGUN E ENERGISË ELEKTRIKE

Në mbështetje të nenit 16 të ligjit nr. 43/2015 “Për sektorin e energjisë elektrike”; kapitullit II, pika II.2.4 të “Rregullave të përkohshme të tregut shqiptar të energjisë elektrike”, miratuar me vendimin e bordit të ERE-s; nr. 139, datë 25.8.2016, të ndryshuar, dhe nenit 26 të “Rregullores për organizimin, funksionimin dhe procedurat e ERE-s”, miratuar me vendimin e bordit të ERE-s nr. 96, datë 17.6.2016”; bordi i ERE-s në mbledhjen e tij të datës 11.5.2017, mbasi shqyrtoi relacionin e “Draftmarrëveshjes për pjesëmarrjen në tregun e energjisë elektrike”, të përgatitur nga drejtoritë teknike,

konstatoi se:

- Kjo Marrëveshje hartohet në zbatim të kapitullit II, pika II 2.4 të “Rregullave të përkohshme të tregut shqiptar të energjisë elektrike”, të miratuar me vendim të bordit të ERE-s nr. 139, datë 25.8.2016.

- Me shkresën nr. 6583 Prot., datë 18.10.2016, OST sh.a. ka dërguar në ERE kërkesën për miratimin e “Draftmarrëveshjes për pjesëmarrjen në tregun e energjisë elektrike”.

- ERE me vendimin nr. 2, datë 19.1.2017, filloi procedurat për miratimin e “Marrëveshjes për pjesëmarrjen në tregun e energjisë elektrike”.

- ERE me shkresën nr. 89 Prot., në datë 26.1.2017, ka ftuar palët e interesuara të shprehin opinionet dhe komentet e tyre në lidhje me draftmarrëveshjen për pjesëmarrjen në tregun e energjisë elektrike.

Autoriteti i Konkurrencës, me shkresën me nr. 31/1 Prot., datë 23.2.2017, ka përcjellë në ERE sugjerimet dhe komentet e saj në lidhje me draftmarrëveshjen për pjesëmarrjen në tregun e energjisë elektrike.

Për gjithë sa më sipër, bordi i ERE-s,

VENDOSI:

a) Të miratojë “Draftmarrëveshjen për pjesëmarrjen në tregun e energjisë elektrike”.

b) Drejtoria Juridike dhe e Mbrojtjes së Konsumatorit të njoftojë shoqërinë OST sh.a., KESH sh.a., OSHEE sh.a., Autoritetin e Konkurrencës, MEI dhe palët e interesuara për vendimin e bordit të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

Ky vendim mund të ankimohet në Gjykatën Administrative Tiranë, brenda 30 ditëve kalendarike nga botimi në Fletoren Zyrtare.

KRYETARI
Petrit Ahmeti

MARRËVESHJA
PËR PJESËMARRJEN NË TREG
MIRATUAR ME VENDIMIN E BORDIT TË ERE NR. 63, DATË 11.5.2017

Marrëveshja për pjesëmarrje në tregun e energjisë elektrike nënshkruhet sot më datë _____ midis Palëve:

- Operatorit të Sistemit të Transmetimit-Operatori i Tregut (OST-OT), i regjistruar në Regjistrin Tregtar (Qendrën Kombëtare të Regjistrimit) me vendimin nr. 31935, datë 14.7.2004 dhe seli në _____, i përfaqësuar nga z. Engjëll Zeqo, këtu e më poshtë i quajtur OST – OT.

- Pjesëmarrësi në tregun e energjisë elektrike, i regjistruar në _____ me nr. _____ dhe seli në _____, i përfaqësuar nga _____, këtu e më poshtë i quajtur _____.

KAPITULLI I DISPOZITA TË PËRGJITHSHME

Neni 1

1.1 OST sh.a. në përputhje me ligjin nr. 43/2015 “Për sektorin e energjisë elektrike”, neni 53, pika 1, është mbajtës i vetëm i licencës për transmetimin e energjisë elektrike, të dhënë nga ERE me vendimin nr. 24 datë 26.3.2009.

Në bazë të Rregullave të Tregut Shqiptar të Energjisë Elektrike, Kapitulli II, pika 2.4, të miratuara me Vendimin nr. 139, datë 15.8.2016 të Bordit të ERE-s, një ndër funksionet e OST sh.a., është ai i operatorit të tregut.

1.2 (Pjesëmarrësi i tregut, Palë e kësaj kontrate) _____ në përputhje me nenin 37, të ligjit nr. 43/2015 “Për sektorin e energjisë elektrike”, është mbajtës i Licencës për _____, të dhënë nga ERE me vendimin nr. _____ datë ____/____/____.

Në bazë të Kapitulli II të Rregullave të Tregut Shqiptar të Energjisë Elektrike, të miratuara me vendimin nr. 139, datë 15.8.2016 të bordit të ERE-s (Pjesëmarrësi i Tregut, Palë e kësaj kontrate) _____, ka funksionin e _____ (sipas aktivitetit të licencuar) në tregun shqiptar të energjisë elektrike.

KAPITULLI II QËLLIMI I MARRËVESHJES

Neni 2

2.1 Kjo marrëveshje rregullon marrëdhëniet ndërmjet palëve që e nënshkruajnë atë, OST-OT dhe pjesëmarrësit në tregun e energjisë elektrike dhe përcaktimin e detyrimeve dhe të drejtave që rrjedhin nga veprimtaria e tyre në tregun e energjisë.

KAPITULLI III TË DREJTAT DHE DETYRIMET E PALËVE

Neni 3

3.1 Palët, bien dakord të pranojnë rolin dhe funksionin përkatës të tyre në tregun e energjisë elektrike, dhe angazhohen të zbatojnë me kujdesin e duhur ligjet, kodet, rregullat dhe praktikat tregtare që rregullojnë ose kanë të bëjnë me sektorin e energjisë elektrike dhe tregun e energjisë elektrike.

3.2 Palët, bien dakord të ndërtojnë dhe zbatojnë marrëveshje dhe kontrata me pjesëmarrësit e tregut të energjisë elektrike në përputhje me Rregullat e Tregut.

3.3 Palët, bien dakord të shkëmbejnë informacione dhe të dhëna në përputhje me të drejtat dhe detyrimet e tyre përkatëse për informim në përputhje me Rregullat e Tregut.

3.4 Palët marrin përsipër të përmbushin detyrimet financiare përkatëse në përputhje me Rregullat e Tregut dhe Marrëveshjet dypalëshe të lidhura në përputhje me to. Në çdo rast Palët nuk do të ndërmarrin kompensimin e ndërsjellë të detyrimeve pa rakordimin dhe miratimin e palës tjetër.

KAPITULLI IV PJESËMARRËSI NË TREG

Neni 4

4.1 Pjesëmarrësi në treg bie dakord që t'u përmbahet në çdo kohë Rregullave të Tregut, gjithë kodeve teknike shoqëruese, dhe procedurave të brendshme të OST – OT që nevojiten për funksionimin e tregut të energjisë elektrike.

4.2 Të gjitha aktet e brendshme të OST – OT sipas pikës 4.1, të cilat pjesëmarrësi do të duhet t'i zbatojë, do të vendosin detyrime të cilat nuk i tejkalojnë detyrimet e përcaktuara në aktet ligjore dhe nënligjore në fushën e energjisë elektrike dhe në aktet e nxjerra nga ERE.

Neni 5

5.1 Pjesëmarrësi në treg është i detyruar të informojë OST – OT në lidhje me çdo kontratë të lidhur. Ai duhet të dorëzojë në OST – OT informacion për çdo kontratë, duke identifikuar si më poshtë:

- i) Identifikimin e palëve të kontraktuara;
- ii) Pikat e livrimit/tërheqjes;
- iii) Kohëzgjatjen e kontratës;
- iv) Sasitë e kontraktuara.

Këto kërkesa do të zbatohen për të gjithë kontratat dypalëshe, përfshirë kontratat për eksport/import.

5.2 Kontrata e lidhur ndërmjet dy pjesëmarrësve në treg, bëhet efektive pasi OST – OT të ketë konfirmuar marrjen e saj. OST – OT duhet të konfirmojë marrjen e një kontrate të tillë brenda jo më vonë se 10 ditë pune. Mungesa e konfirmimit brenda këtij afati e bën efektive kontratën.

Neni 6

Pjesëmarrësi në treg duhet të dorëzojë tek OST – OT njoftimet lidhur me gjithë shkëmbimet fizike neto mes palëve individuale (njoftime kontraktuale) ose ndërmjet palëve përgjegjëse për balancimin, me qëllim realizimin fizik të detyrimeve kontraktuale.

Neni 7

7.1 Pjesëmarrësi në treg do t'i paraqesë OST një program ditor në përputhje me procesin e programimit të ditës në avancë, siç specifikohet në Kodin e Rrjetit, me qëllim që OST të përcaktojë formatin e programit ditor.

7.2 Forma dhe mënyra e paraqitjes së programit ditor dhe procedurat e tjera ndihmëse janë objekt i përcaktimit të OST sh.a. në përputhje me Kodet e Rrjetit dhe Rregullat e Tregut.

Neni 8

8.1 Pjesëmarrësi në treg do të marrë përgjegjësi për balancimin përkundrejt OST për gjithë prodhimin, blerjen, importin, eksportin, shitjen ose konsumin e tij.

8.2 Pjesëmarrësit e tregut të energjisë elektrike mund të rregullojnë përgjegjësinë për balancimin, nëpërmjet një kontrate me Operatorin e Sistemit të Transmetimit duke marrë statusin e palës përgjegjëse për balancim ose duke nënshkruar një kontratë për transferimin e përgjegjësisë së balancimit ndaj një pale tjetër përgjegjëse për balancimin, duke u bërë pjesëtar i një grupi balancues, në përputhje me Rregullat e Tregut. Në rast se kjo balancë nuk ofrohet dhe për çdo mos realizim në kohë, substancë dhe formë të detyrimeve që rrjedhin nga Rregullat e Tregut dhe kjo marrëveshje, nga pala përgjegjëse, pjesëmarrësi mund të kërkojë shpërblim.

8.3 Deri në krijimin e tregut të balancimit, tarifat për realizimin e shërbimit të balancimit

vendosen sipas metodologjisë së miratuar nga ERE. Kjo metodologji duhet të reflektojë kostot dhe bëhet publike.

8.4 Atje ku Rregullat e Tregut nuk e përcaktojnë, përgjegjësia do të nxirret në bazë të Kodit Civil.

KAPITULLI V

OST – OT

Neni 9

9.1 OST- OT, ka të drejtë të kërkojë nga pjesëmarrësi i tregut të gjithë informacionin e nevojshëm, në përputhje me Rregullat e Tregut të Energjisë Elektrike, Kodin e Rrjetit dhe kodet teknike shoqëruese, procedurat dhe protokollet e brendshme të OST – OT që nevojiten për funksionimin e tregut të energjisë elektrike.

Neni 10

10.1 OST - OT është e detyruar të përdorë informacionin e siguruar nga pjesëmarrësi i tregut, në përputhje me Rregullat e Tregut të Energjisë Elektrike, Kodin e Rrjetit dhe kodet teknike shoqëruese, procedurat dhe protokollet e brendshme të OST – OT që nevojiten për funksionimin e tregut të energjisë elektrike.

Neni 11

11.1 OST - OT do t'i bëjë të disponueshme çdo pjesëmarrësi në treg çdo informacion lidhur me operimin e tregut të energjisë elektrike të papërcaktuar si konfidencial ose komercialisht të ndjeshëm.

Përfundimisht përcaktimet e 11.1, dhe vetëm në interesin dhe funksionin publik që rrjedh nga veprimtaria e Operatorit të Sistemit të Shpërndarjes (OSSH) dhe Furnizuesi i Shërbimit Universal (FSHU), OST-OT do t'i japë OSSH-së dhe FSHU-së të dhëna që këto operatorë (d.m.th. OSSH dhe FSHU) dhe mund të kërkojnë për mbarrëvajtjen e shërbimeve të tyre.

KAPITULLI VI

HYRJA NË FUQI DHE ZGJIDHJA /PËRFUNDIMI I MARRËVESHJES

Neni 12

12.1 Nënshkrimi i kësaj marrëveshje është kusht për pjesëmarrje në tregun e energjisë elektrike. Nënshkrimi do të bëhet vetëm nga persona të cilët janë të autorizuar drejtpërdrejtë në bazë të legjislacionit shqiptar apo me prokurë për të përfaqësuar secilën palë.

12.2 Kjo marrëveshje bëhet efektive dhe e detyrueshme për Palët në datën e zbatimit të saj.

12.3 Kjo marrëveshje është pa afat dhe Pjesëmarrësi mund ta zgjidh duke i dhënë njoftim paraprak OST-OT. OST-OT nga ana e saj mund ta zgjidh marrëveshjen vetëm për arsye të mbështetura dhe vetëm pas miratimit të ERE.

Neni 13

Një pjesëmarrës tregu mund të tërhiqet nga tregu i energjisë elektrike me iniciativën e tij, bazuar në një njoftim me shkrim të nënshkruar nga përfaqësuesi i autorizuar i këtij pjesëmarrësi. Njoftimi duhet paraqitur të paktën 3 muaj para datës kur duhet anuluar regjistrimi i pjesëmarrësit të tregut dhe duhet përfunduar marrëveshja. Pas marrjes së këtij njoftimi, OST-ja do të informojë menjëherë të gjithë pjesëmarrësit e tjerë të tregut.

Neni 14

Nëse pjesëmarrësi nuk mund t'i plotësojë të gjitha kushtet e Rregullave të Tregut atëherë pjesëmarrësi

ose OST-OT duhet të informojnë ERE-n brenda 10 ditë pune nga konstatimi për kushtet.

Neni 15

OST-OT do të pezullojë veprimtaritë tregtare të pjesëmarrësve nëse plotësohet ndonjë nga kushtet e mëposhtme:

- Pjesëmarrësi i tregut nuk përmbush më një ose më shumë kushte të nevojshme për regjistrim si pjesëmarrës tregu (siç përcaktohet në Dispozitat për Procedurat e Regjistrimit në Tregun e Energjisë Elektrike);
- Pjesëmarrësi i tregut nuk përmbush më kërkesat që lidhen me garancinë financiare ose nuk bën pagesat e tjera (të parashikuara në Dispozitat për Procedurat e Regjistrimit në Tregun e Energjisë Elektrike);
- Pjesëmarrësi i tregut nuk respekton Marrëveshjen për Pjesëmarrjen në Treg;
- Pjesëmarrësi i tregut gjendet vazhdimisht fajtor për mosrespektimin e rregullave të tregut dhe gjithë kodeve të zbatueshme për tregun shqiptar të energjisë elektrike ose marrëveshjen financiare.

Neni 16

Nëse pjesëmarrësi i tregut nuk mund të provojë se e ka shmangur shkakun (shkaqet) që shkaktoi pezullimin e tij, gjatë periudhës së specifikuar në njoftimin për pezullim, atëherë OST-OT do të procedojë me përfundimin e Marrëveshjes për Pjesëmarrjen në Treg.

Nëse ky vendim i OST-OT kundërshtohet nga pjesëmarrësi atëherë pas paraqitjes së ankesës, ERE do të verifikojë nëse arsyet për pezullimin e veprimtarive tregtare janë të justifikuara dhe do të marrë vendimin brenda 15 ditëve pune nga marrja e ankesës.

Paraqitja në ERE e ankesës nga pjesëmarrësi i tregut, pezullon zbatimin e vendimit të OST sh.a. deri në marrjen e vendimit nga ERE.

Neni 17

Nëse regjistrimi i pjesëmarrësit të tregut pezullohet atëherë të gjitha ofertat e mbetura pezull (të reja) të pjesëmarrësit të tregut do të anulohen automatikisht për gjithë periudhën e pezullimit.

Neni 18

18.1 OST-OT do ta përfundojë Marrëveshjen për Pjesëmarrje në Treg të një pjesëmarrësi tregu në secilin nga këto raste:

- a) Nëse pjesëmarrësi në treg nuk përmbush më një ose disa nga kushtet e nevojshme për regjistrimin si pjesëmarrës tregu (siç përcaktohet në Dispozitat për Procedurat e Regjistrimit në Tregun e Energjisë Elektrike);
- b) Nëse pjesëmarrësi në treg nuk përmbush më kërkesat që lidhen me garancinë financiare (siç përcaktohet në Dispozitat për Procedurat e Regjistrimit në Tregun e Energjisë Elektrike);
- c) Nëse pjesëmarrësi i tregut nuk respekton Marrëveshjen për Pjesëmarrjen në Treg;
- d) Nëse pjesëmarrësi në treg gjendet vazhdimisht fajtor për mosrespektimin e rregullave të tregut dhe gjithë kodeve të zbatueshme për tregun shqiptar të energjisë elektrike.

18.2 Marrëveshja për pjesëmarrjen në treg do të revokohet automatikisht dhe menjëherë, kur pjesëmarrësit në treg i hiqet licenca nga ERE.

Neni 19

Mosmarrëveshjet mes palëve që nuk janë arritur të zgjidhen në mënyrë miqësore do të lihen në kompetencën e ERE për t'u gjykuar. ERE do të marrë vendimin e saj brenda 15 ditëve pune nga marrja e ankesës. Pavarësisht vendimit të ERE-s dhe pas arritjes së këtij vendimi, Palët kanë të drejtë t'i drejtohen gjykatës për shqyrtimin gjyqësor të konflikteve. Gjykata kompetente për shqyrtimin e

mosmarrëveshjeve do të jetë Gjykata Administrative.

Kjo marrëveshje nënshkruhet në tri kopje, një për pjesëmarrësin në treg dhe dy për OST – OT.

Forma e kësaj marrëveshje është miratuar nga ERE si “Marrëveshja për Pjesëmarrjen në Treg”,
mevendimin nr. _____ datë ____/____/_____

Operatori i Sistemit të Transmetimit

Pjesëmarrësi në Treg